

# Prostitushon No Por ta Problema!

Fundashon Dunami Bo Man ta trahando vários aña kaba na Kòrsou huntu ku GGD i polis pa protehá nos hóbenan for di prostitushon i pa reskatá esnan ku ya kaba a kai den e bida aki. Na aña 1998, nan a logra saka 163 persona for di prostitushon.

Segun señora Pinedo di e organisashon aki, hóbenan for di 14 pa 15 aña di edat ta kuminsá move den e mundu di prostitushon. Asta por tin mucha di 13 aña ta prostituí.

E ta tuma nota di prostitushon na skol. Den “pouze”, hóbenan ta drenta outo, bai tira nan bueltanan, i regresá skol i sigui lès normal manera nada n’ pasa.

Señora Pinedo a splika ku mayoria hobensita ta kai den prostitushon pa motibu di problema finansiero. Den algun kaso, e mayornan ta na haltura ku e hóben ta prostituí. Asta por tin kaso ku e mayornan mes ta hinka e yu den un mal kaminda.

Sin duda nos tur ta aploudí esfuersonan pa reskatá mucha muhénan for di prostitushon. Ma mi ta keda konfundí. Na un banda nos ta di akuerdo pa reskatá hobensitanan for di prostitushon. Di otro banda, nos ta asepta komo masha normal filosofianan ku ta hasi reskate for di prostitushon apsurdo.

Tantu hende den nos komunitat tin e mentalidat ku relashon seksual fuera di matrimonio no ta piká basta ku nan ta “protehá”. Nan a wòrdu indoktriná pa kere ku hóbenan lo hasi sèks tòg, pesei mihó duna nan un kondon pa nan ta seif. Asta zuster ta bishitá skolnan i parti kondon pa e alumnonan.

Despensámi, ma mi’n ta komprendé kiko presis e problema ta. Si un alumno, siguiendo nos filosofia popular, ta usa un kondon—**talbes e mésun kondon ku e zuster a regal’è na skol**—i ta us’è pa haña un tiki entrada, pakiko esei ta problema? **Ta nos mes filosofia ta aprobá pa e zuster regal’è e kondon!**

Talbes nos problema ta su edat hóben? Si esei ta nos problema, ta ki mishí nos dunando kondon na alumno di e edat ei na skol? Si bo regalá un hende un hanskun, ta masha normal pa e pas e. Si bo regalá un hóben un kondon, ta masha lógiko pa e purb’è apesar di su edat.

E problema ta ku prostitushon no ta un sistema di bida salú? Si esei ta un echo, pakiko pèrmití un zuster—**un persona ku mester sa loke ta salú**—splika alumnonan kon pa usa kondon. Un momentu e zuster ta deskurashá relashon seksual parotin. Nèt despues e mesun zuster ta afirmá ku kondon ta garantisá “safe sex”. Algu no ta kuadra! Si kondon ta asina seif, pakiko evitá sèks parotin? Pakiko no enkurashá nos yunan muhé pa bende nan kurpa pa haña un tiki entrada? Ta lógiko tòg!

Ta tempu pa nos habri wowo! **E filosofia di kondon ta un filosofia desastroso! E ta un filosofia immoral ku ta pone hende komportá nan meskos ku bestia!** Anto ora nan ta komportá manera bestia, nos ta ku man na kabes i ta haña ku nos tin ku reskatá nan for di e tipo di bida ku nos mes filosofía a hinka nan aden. E filosofia di kondon ta pretendé di benefisiá bo yu hóben, ma finalmente e ta kousa mas herida!

Relashon intimo fuera di un konteksto di amor permanente di matrimonio ta kousa heridanan emoshonal, mental, spiritual, i fisiko. Ningun kondon por protehá un hóben for di tur e daño ei! Klaramente e plan simpel di nos Kreador ta muchu mas mihó: **apstené di tur relashon seksual te matrimonio**. Beibel ta bisa “*Apstené boso di immoralidat seksual*” (1 Tesalonisensenan 4:3). “*Hui di immoralidat...e hende immoral ta peka kontra su mes kurpa*” (1 Korintionan 6:18).

Si nos ta asepta ku Dios tin rason, manera Fundashon Dunámi Bo Man ta hasi, anto nos mester hasi máksimo esfuerso pa reskatá hóbenan for di prostitushon. Ma si filosofía di kondon ta bèrdat, anto ta ko’i kèns nos ta hasi pretendiendo ku prostitushon ta un problema.